

聽秋聲館詞話

聽秋聲館詞話卷十

無錫丁紹儀杏舫

人生百行首重忠孝比年賊氛未靖以忠節報者已不知凡幾獨孝子卽承平時綜各省所舉歲不過數人其間剖肱廬墓或猶有務名之心能不繫情妻子捐生以殉者世不多覩近有陽湖楊聽臚孝廉

傳第

己酉舉於

鄉貧甚幕食汴中值賊陷京口迎母避亂居汴城外之黑岡辛酉秋捻匪擾汴孝廉閉城中不得出賊退知母被戕一慟幾絕日嘔血升許越八日卒或傳仰藥死海蕙田都轉

鍾

爲賦楊孝子行謂錚錚奇行足光青史近

得劉雲樵觀察書言已爲之請 旌矣孝廉著述頗富

余祇見其齊天樂云秣陵往事成惆悵。嬋娟月明千里。  
曾照人來。不教人去。一味怨他江水。去時容易。怎消息  
參差。誤人如此。捫徧闌干。晚來認取指痕細。○舊歡竟  
如夢裏。餘香凝彩筆。休問蛾翠。車走雷聲。衣黏花影。髣  
髴靈儔徙倚。蘆花風起。趁月地飛迴。舊家燕子。幾度思  
量。去來拚不是。當是金陵陷時。有慨而作其他詩詞。吾  
郡多好事君子。諒有爲之收緝者。又余友趙一清茂才  
元音

平時事親誠謹。無他異。庚申邑陷。奉父俊匿鄉之

譚村。賊至。已捨之去。見父被擄。急前請代。賊並繫之。遂

大罵賊怒縛之柱罵益厲刳腹剖心備極慘毒其兄少

仙明經

丹成

余表妹婿也見之憤甚亦大罵與父同遇

害表妹畢氏挈一子一女偕夫姊程趙氏均投河死姊

之夫附生程正謬

鈴

亦死於賊今存茂才妻陳氏孑然

孀守家無人矣忠義局請卹率類舉姓氏於死事狀未

必詳敘余恐久而泯滅附志於此同一死賊似茂才兄

弟加人一等矣

新城楊臥雲中翰

希閔

好聚書手選歷朝詩詞爲詩軌

詞軌加以評斷用力可謂勤矣丙辰丁巳間賊擾建昌

集數百人成一旅屢與賊戰時江閩兵屯壘相望無有

以一矢遺賊者逮新城再陷家毀力竭始間關赴閩藉  
筆耕餬口余初見其痛飲詞心儀之久乃握晤髮已蒼  
然然英氣猶勃勃也茲錄其登邵武熙春山憶江南云  
登樓望斜照隔鄉關疏樹淡煙籠雉堞晚鐘清磬接鼇  
山飛鳥幾行還舟次邵武大乾謁隋守歐陽公祠墓好  
事近云嵐氣溼衣衫山鎖一灣寒碧中瘞隋朝忠骨薦  
牲馨盈百○墳前翁仲已頽唐靈爽尙憑式欲就蓬窗  
高臥奈灘聲嗚咽按歐陽公名祐官溫陵守任滿歸值  
隋亡恥事二姓全家沉於大乾里人爲葬山之陽立祠  
祀之祈夢奇驗事見邵武府志正史失載獨劉起潛隱

居通議所述大乾夢錄謂愛山水清秀盤桓久之已而  
舟溺葬其地遂著靈應語與志異以是知古來忠烈湮  
沒不少卽如中翰不克少展所學埋頭故紙中以老余  
不能無慨焉

國初趙天羽給諫

吉士

由副貢生官交城令寇盜充斥

設計平之內擢御史遷給事中所著萬青閣詞多側豔  
體余獨愛其登晉陽城樓點絳脣云獨上危樓茫茫不  
辨天南北孤城屹立山色周遭碧○狐突千峯多少豺  
狼匿西風急數聲簞簞一抹寒煙白臨洛關偷聲木蘭  
花云邯鄲古道臨洛驛回首太行青歷歷極目蒼涼曾

是中原舊戰場。○可憐鬼火明如豆。一派西風黃葉瘦。  
聽徹三更。嗚咽城頭凍角聲。甲寅元夕浪淘沙云望遠  
思騰騰。烽火心驚。極天士馬正縱橫。卻喜海陽今夜月。  
還似承平。○巷陌更添燈。春滿山城。畫圖人醉水晶屏。  
側聽譙樓樓上鼓。剛打三更。吳宮懷古虞美人云蘇臺  
零落荒煙斷。鹿走長洲苑。西風吹冷館。娃宮惟有藕花  
愁對夕陽紅。○胥門挾後瀉聲怒。山鷓啼何苦。吳亡越  
霸不須哀。又見會稽一炬楚人來。冬夜宿北頂僧舍相  
思引云霜落疏林。劒氣濃。短籬黃葉吼西風。酒寒燈燼。  
響徹隔牆鐘。○不辨狂沙連塞白。驚看野燒接天紅。虎

蹲獅踞。直北是居庸。玉笛金笳別饒逸響。

韓忠獻趙清獻范文正李忠定爲有宋一代名臣而詞  
采流傳如愁無際。武陵凝睇。人遠波空翠。明月高樓休  
獨倚。酒入愁腸。化作相思淚。與寶瑟塵生。金雁空零落。  
悵青春又過。年年此恨。滿東風淚。等語足與勲業並昭  
千古。我朝如湯文正斌陳文貞廷敬陳勤恪鵬年文章  
經濟媲美前賢。亦有詞句流傳。文貞紅窗聽云玉軫霜  
絃。欣暫倚。更何必。碎從燕市。窗燈簾月。閑相對。覺吾將  
老矣。○目送手揮。聊復爾。正良夜。碧天如水。漏聲初起。  
征鴻過盡。奈鄉愁難寄。文正秋日閒居滿庭芳云雲澹



霜洲雁飛葭浦。兩行煙樹。柴門紙窗茅屋。秋氣映朝暉。  
壯歲歸田賦就。閑居好。高臥邱園。耦耕侶。荷鋤問訊。紅  
葉認山村。○漫論。今古事。柴桑谷口。往跡猶存。但茶香  
竹裏。酒沸松根。倚枕清眠初覺。東籬看菊蕊堪殫。憑闌  
坐。南華一卷。諷詠到黃昏。勤恪寒夜對酒。浪淘沙云殘  
月轉新晴。夜靜寒生。霜花如雨撲簾旌。最是高堂今夕  
夢。暗數歸程。○無計破愁城。驀地心驚。十年宦海竟何  
成。縱使圍鑪還對酒。到底淒清。或鄙詞爲小道。無足稱  
者。抑知古今名臣。每多寄興。不僅歐蘇兩文忠。足占詞  
壇俎豆也。

宋時閩中詞人輩出。明以來幾成絕響。近日始有人習之。省以外仍寥寥也。獨歐甯許克孳明經廣輿酷嗜倚聲。所著蘿月山館詞蝶戀花云。悶掩閑窗消永晝。小小蛾彎。綠得愁痕皺。人在子規聲裏瘦。落花幾點春寒驟。○坐擁博山熏翠袖。燕姁鶯嬌。不管儂僂僂。拍斷闌干吟未就。鸚哥驚醒將人咒。新燕卜算子云。門巷尙依稀。滿地芹泥潤。舊夢盧家記不真。飛向簾櫳認。○花影掠紅襟。已是黃昏近。不見樓前翠袖人。樓外紅成陣。十二月望夜。西子妝云。風鍊霜華。煙凝星影。醉後酒襟寒淺。夜深猶自凭危闌。悵蒼涼。舊時庭院。圓蟾又滿。問一歲。

團圓幾遍。算今年、儘者番圓了。明年重看。○羅浮遠。野  
鶴飛還。寂寞關山。怨樽前、纔聽話將離。奈青瑣、更教人  
戀。吹殘翠管。怕回首、茶煙消黯。且圓鑪、重夢梅花未晚。  
於聲華歇絕時。獨尋墜緒。可謂有志之士。後遊武夷登  
絕頂。失足墜崖死。

袁子才太史以詩文雄一時。而不解填詞。嗣君蘭村大

令。

通

獨工倚聲。在白下。則有汪鄴樓馬棣原金雨香入

都。則與錢謝庵邵蘭風諸君唱和無虛日。所著捧月樓  
詞。雖宗法不出南宋諸家。亦不爲浙派所拘。醉太平云  
山程水程。長亭短亭。有人遠道初經。數郵籤與聽。○帆

開曉行。潮生夜停。累他小膽頻驚。聽風聲水聲。菩薩蠻  
云。可憐九月初三夜。月痕又到犀簾下。沒箇捲簾人。蛛  
絲網細塵。○沉沉更漏永。薄薄羅衾冷。只此惹魂銷。今  
宵第幾宵。題永州司馬李虎觀梅梁漁隱圖金縷曲云  
展卷呼奇絕。者溪山依稀夢裏。記曾游歷。一樣樓臺低  
壓水。一樣疏林延月。更一樣胡麻留客。不信先生真到  
此。借生綃。寫出煙巒活。渾似見舊相識。○荆湘遠挂看  
山笏。想閑情香尋沅芷。歌諧湘瑟。乞取鑑湖他日事。安  
穩浮家泛宅。相約換雨蓑煙笠。竿拂珊瑚雲送槳。倚瓊  
簫吹破湖煙碧。鷗盟在。願同結。靈芬館詞話僅舉行香

子與桃花和粥。嚙心裏葬春多句。非其至也。大令官內  
黃令卒於中州。子又村司馬。攝上海令。殞匪難。猶女柔  
吉。幼嫺吟詠。適天長崇氏歸甯。金陵城陷。投水自盡。猶  
子竹畦貳尹。起亦工詞。善畫。有畫延年室。詞荷葉杯云。  
喚得愁來春去。鶯語花裏一聲聲。斜陽啼斷有誰聽。不  
似舊時情。○滿院落紅飛絮。風雨做就困人天。綠窗纔  
起。又思眠。香夢去誰邊。登滄浪亭。懷六舟上人。祝英臺  
近。云綠陰疏。啼鳥靜。門掩夕陽冷。衰柳危橋。畫出寂寥  
景。春風十二紅闌。隨波曲曲。知多少。袖羅曾凭。○暗銷  
凝。遍探虛閣迴廊。寒蛩鬧莎徑。小憩孤亭。客思有誰省。

徘徊不見參寥。錫飛何處。空閑煞。石牀花影。一門風雅。  
歷百年不替。且以忠烈顯從古。詩人罕有倫比。

蘭村需次都門。汪鄴樓致書問訊。中緘梅花兩朶。言是  
倉山香雪海中向北枝也。並勝以虞美人詞。蘭村和韻。  
云。開函忽覺香沾手。兩點梅魂瘦。謝他舊雨太關心。教  
識故園春已者般深。○赫蹏紙薄重重護。好伴離人住。  
家山千樹正橫斜。只汝迢迢尋我到天涯。令人誦之黯  
然。鄴樓名度有玉山堂。詞秋齋夜讀。初聞蟲聲。清平樂  
云。不煩刀尺。猛把愁絲織。雜入漏聲疏又密。夜夜燈挑  
寒碧。○銀河倒瀉空庭。癡雲攔住飛星。夢到故山籬落。

幾人輸我先聽。棣原名功。儀所著倚雲亭詞。與玉山堂  
相伯仲。菩薩蠻云。紅樓寒怯東風緊。紅羅夢裏春人醒。  
悔不卷簾招。賣花聲過橋。○相思疑中酒。怕說今番瘦。  
爭奈海棠開。只他雙燕來。兩香名惠恩。官安徽知縣上  
已修禊飲老梅花下。一萼紅云。過花朝。卻暖輕寒重。晴  
雪未曾消。香避風輕影和人瘦。奪他桃李新嬌。儘春色  
三分去。二觴詠處。還似度溪橋。買玉提壺。揮毫選石。拚  
到深宵。○漫說蘭亭韻事。只臞仙入座。此約難招。日挽  
頰紅。苔鋪冷碧。纖柯堆滿瓊瑤。待晚煙微遮。亭角渾凝  
脂。斜罩一層綃。添與如眉新月。挂向寒梢。三君皆居金

陵與蘭村善

嘉慶初蘭村謁選入都與錢謝庵楊伯夔吳蘭園程春  
廬諸公爲消寒會時邵蘭風將赴河間幕咸賦詞以贈  
謝庵詞最佳調寄摸魚兒云正長安酒人歡聚匆匆離  
緒偏起圍鑪不厭深更話明日留君無計君去矣訝纔  
說消寒便惹銷魂意夜長如此且拋卻愁心暫同諧笑  
頭沒酒杯裏○河閒地凍合滹沱千里酸風獵獵吹耳  
悲歌慷慨真無益莫唱清商變徵君解未悵從古依人  
誰吐元龍氣月華如水算夜夜江南夢魂歸去後夜又  
燕市謝庵名枚己未進士仁和人著有微波詞南歌子



云好夢難重做。春愁又一年。東風吹起夜窗眠。依舊初三  
三月子。不曾圓。○曉露凝香溼。游絲惹恨牽。桃花開近  
翠簾前。花外一重涼。雨一重煙。蘭園名自求。居江甯官  
浙江景甯令。爲余友。伯鈞明府尊人有題太真合樂圖  
霓裳中序第一。云繁聲恍聽得。約略霓裳第三疊。貼地  
錦裯瓊席。一霎春生。沈香亭側。玉妃小立。儼倚醉嬌慵。  
無力。想欲演紫雲迴曲。偷壓隔花笛。○誰覓生綃盈尺。  
早寫出。唐宮風月。豪華勝境爭識。瓊管吹香。舞袖翻雪。  
三郎眞俊絕。把羯鼓。勻圓親擊。試問取。都蘭荅刺。何似  
戰輦急。春廬名同文桐鄉人。亦己未進士官兵部郎有

分詠蘋婆菓月華清云珍餉甘分釘筵香擘燕南絕勝  
風味淺綠輕紅襯出肌膚玉鳳贈伊名佛也多情怎拈  
得相思兩字猶記是黃姑津畔靈根謫世○憶見素花  
簪髻早露飽煙酣摘殘秋翠小劫罡風護過春頭臘尾  
愛掌搓替月能圓憐齒齧融霜微脆函子待歸種家園  
配他青李桐鄉產樵李故擬配蘋菓云

古人以經術飾吏治今則政事文學判若兩途殊不可  
解以余所見蔡君笛椽下筆滔滔清辨而吏事非所長  
宰江陵以拘緩被黜包丈愼伯

世臣

究心世務與先伯

父同舉戊辰秋榜所著安吳四種於水利農田尤致意

馬逮出宰江右有鬪毆殺人者丈自以教化不行引咎  
勘時不問釁由先語以同閭共井宜敦禮讓娓娓數百  
言衆皆掩口胡盧卒以迂拙不任事引疾歸丈工古文  
詩詞不多作有過富莊驛訪謳者月梧不見土人述其  
所遭言已遞回高陽舊籍譜詞誌之用清真韻六醜云  
乍閑情賦就有多少新愁難擲舊時爪痕纖纖輕似翼  
重認無跡卻指紅樓外晶簾低映一笑眞傾國羅襦幾  
度沾芳澤拾翠清流條桑繡陌年華可堪追惜竟雲封  
院落珠網櫺櫺○空庭春寂任萋萋草碧欲問年時事  
無信息垂楊不慣留客儘長條踈地嫋娜何極章臺上

記曾岸幘。誰復省此日橫波月小。斂煙山側。殘紅墜漫。  
問歸汐。只舊池好。認高陽路。孤根寄得。丈晚年寓。居金  
陵。築白門。倦游閣。卽以名詞。

高君茶庵以吳下兩故人詞見示一長洲宋明經

志沂

字浣花詞名梅笛咸豐十年蘇城陷殉難一吳縣王愧

庵布衣

復

有煙波閣詞蘇州被兵挈妻子旅寓於杭園

城中忍饑垂斃城破沒於亂軍中生平著述均歸劫火

茶庵與劉泖生司馬

履芬

潘瘦羊明經

鍾瑞

搜羅鈔撮

僅得十之一二云其上乘已渺不可追然渥注下駟猶

具神姿愧庵唐多令云香燼繡簾空。喁喁鏡鑑中。助淒

清唧唧寒蛩絮得秋宵更短短風淅淅月濛濛○如畫  
小眉峯分明恨萬重夢無聊燈暈微紅夢慣銷魂推夢  
去還對影話愁衷蝶戀花云夢覺雁聲和月墜背著寒  
燈悶擁孤衾睡西北風尖吹欲死柳絲怎把郎船繫○  
驀上心頭還眼底百苦千辛第一愁滋味天末芙蓉湖  
上水相思付與迴潮寄邗江舟次題湘君小影長亭怨  
慢云正遙夜夢闌孤艇淡月微茫殘燈掩映展取生綃  
亭亭一尺驚聲作去鴻影香魂遠近應盪作梨雲冷畫裏  
小眉峯猶恐被餘愁壓損○誰省悵憐儂憶汝一雲鈿  
樓韶景星眸黯黯慣拋向酒邊人領甚短夢綠簪紅飄

抵一劫。曇花長命。問綺業如何。二十四橋煙暝。浣花霜  
天曉角。云燈影簾間。酒醒人未眠。卻被城頭畫角。吹月  
色。到愁邊。○更殘。霜滿天。早梅香可憐。莫問春風消息。  
春如夢。夢如煙。謁金門。云天又暝。細雨一簾香冷。雨到  
晴時風不定。月明花顫影。○今夜枕邊偷省。昨夜鏡邊  
笑並。料得畫樓殘醉醒。晚妝和淚等。竹夫人疏影。云空  
牀聘得。怪箇儂瘦削。無限憐惜。脈脈含情。悄悄相偎。湘  
雲夢裏猶碧。冰肌玉骨還如舊。但換卻當初顏色。記那  
回。翠袖天寒。彈指已成今昔。○歡境匆匆過了。嫩涼漸  
到枕。今夕何夕。冷淡芳心。不合時宜。莫怨薄情拋擲。年

年歷盡秋風恨。料此意齊紈能識。只願伊長報平安。未必重逢無日。美人蕉臨江仙云。綠滿情天。秋最好。如花悄立牆陰。相思遙望碧雲深。竹邊羅袖薄。一寸展紅心。○卻悔愁根當日種。秋娘憔悴難禁。隔簾聽雨夜沉沉。西風容易老。斷夢可能尋。時吳縣潘子繡茂才。遵璫亦殉蘇城之難。著有香隱庵詞。喝火令云。一角紅樓側。雙鬢碧玉家。那時同話夕陽斜。不道藍橋重到。夢影已天涯。○空贈當筵扇。難尋泛海槎。人生能有幾韶華。禁得年年飛絮。又飛花。禁得花花絮絮。飛徧舊窗紗。秋蟬孟家蟬云。向古槐影裏。暮柳陰中。嘶破涼天。漫灑齊宮淚。

怕抱葉生憐。敲冷一聲清磬。還隱約、重理琴絃。最淒然。  
客鬢蓬鬆。聽徹風前。○情牽。問天涯甚處。可覓知音。寄  
與冰牋。餘恨一襟。應化縷縷蒼煙。便有蟲吟。漸替算已  
是吸露年年。斷橋邊。暑氣消殘。猶訴纏綿。此調係宋潘  
元質自度腔

詞譜詞律  
均未收

又余友史煥庭明經

應蘭

吾邑陷時避居西

鄉。賊至自盡。浣溪紗云。乍試輕羅怯曉寒。遠山新翠落  
眉端。悄拈紅豆把鶯彈。○花是合歡親去種。酒因祛悶  
偶成酣。藏鉤微笑耐人看。尙見其題友人松風蕉雨圖  
卜算子詞甚佳。不能追記矣。

馮柳東大令謂柳永鬪百花終日扁朱戶。應作換頭起



句詞綜誤屬上闕詞律收晁補之詞亦同此誤致疑參  
差無味宜矣按鬪百花調柳詞三闕一云鸞輅音塵遠  
屬上屬下均可一云舉措多嬌媚若作換頭起句則上  
文如描似削身材怯雨羞雲情意詞氣似尙未足晁詞  
亦三闕一卽詞律所收百態生珠翠截上歸下已覺牽  
強一云重向溪堂臨風看舞梁州依舊照人秋水緊接  
轉更添姿媚以足上文語氣若截歸下闕似與下文與  
問堦上簸錢時節應記轉不相接一云微笑遮紈扇細  
玩詞意亦宜屬上不宜屬下乃未經互校率臆言之昔  
賢有知得毋齒冷大令名登府嘉興人由翰林散館官

福建知縣性怪誕不習吏事改教授歸在閩時偶游北  
里眷一姝色已衰且陋甚顧譽之不去口臨行出七品  
繡服爲贈云可作鴛枕睡幸毋忘交頸時一時傳以爲  
笑所著月湖秋瑟種芸仙館詞各二卷獨不失金風亭  
長矩燠楊花浣溪紗云雪暖江南愁煞人綠楊晴絮滿  
金城東風如夢了殘春○流水難消輕薄恨落花同是  
別離身畫闌飛徧總無聲自題楊柳岸圖長亭怨慢云  
又聽到棲鴉時節冷雨疏枝秋聲來驟送別年年亂條  
攀盡忍分手銷魂短艇早催渡河橋口柳縱有青時卻  
不管離人消瘦○馬首悵殘陽千里倦向西風沽酒一

絲影裏已換了暮蟬亭埃問那處夜笛樓頭恐歸去綠

陰非舊但月曉風尖付與鶯儂燕慙

首句不用韻係張玉田體

落葉

浪淘沙云夜雨打林扉露冷霜淒白門秋柳漸疏稀說

與西風留一葉尚有蟬棲○飄泊任高低鶴怨鵲啼斷

腸人在小窗西恨碧闌紅全不是舊徑都迷

長洲徐貫時過平原有見云春風解下貂圍脖露出螭

蟻雪不如錢塘洪昉思詠燕女云身輕不用健兒扶捉

鞭自上桃花馬隨園詩話謂摹寫燕趙佳人風流可想

時嘉善顧輝六

理美

有解珮令云高靴窄袖一般明秀

只盤龍兩局低覆似燕身輕早跨上桃花馬驟捉金鞭

半垂纖手。○歌呼擊缶。伊涼競奏。恍哀鴻飛來隴右。江  
左繁華爭得似。關西田寶。滿銀盃。酪濃如酒。尤爲曲盡  
又太倉王次谷曜升減字木蘭花云春風何處。燕隔珠  
簾啼不住。曉日侯家。犬帶金鈴臥落花。○打圍郊外曲  
室紅妝燈底待。索酒橋頭。別館青衣馬上留。寫五陵豪  
貴。非特如繪言外之意。讀者自知。

吳縣石琢堂廉訪

韞玉

由修撰外任陳臬楚南會屬邑

有以強姦訟者。公因事無確證。批牘中用難保無三字。  
作轉語後。其事上聞。

仁宗謂書生掉弄筆頭。罷公官。公意不能無慊。恒笑謂

人曰難保無正可對莫須有也公歸後潛心著述常箋  
袁子才太史四六文頗精博著有花韻庵詞清平樂云  
彈絲吹竹花裏人如玉歌徹紫雲迴一曲山與眉峯爭  
綠○幽情暗惜芳菲醉吟心事誰知漫說湖同西子風  
懷不似當時舟泊廣陵滿江紅云百雉臨江依舊是綠  
楊城郭看處處絲簧脆銀燈珠箔明月二分秋有恨  
瓊花一謝春無著但孤舟敲枕聽寒潮還如昨○迷樓  
石苔痕駁平山樹鵲聲惡笑人生幾箇腰纏騎鶴三閣  
吟詩同向盡六州聚鐵終成錯算從來兒女與英雄都  
零落噫公在時揚州尙繁盛逮鹺務更張後繼以兵燹

使公今日經行正不知如何感喟耳

潛山熊藕頤明經

寶泰

生七月乏乳哺以藕粉得活因

字藕生後易今字工詩古文所著藕頤類稿附詞二卷  
類多俳體不詭於雅者步蟾宮一闕耳詞云爲誰溼透  
臨風袂全不辨露珠珠淚重來憔悴是崔郎怕花下小  
門深閉○當時獨擁黃綢被隔著箇窗兒無寐而今依  
舊是相思更添了別離情味明經父

會珍

官江蘇饒吏

才由從九品薦升知府任丹徒時黃文襄

廷桂

爲總督

涕唾屬吏無敢忤值

南巡除道公不忍毀人塚墓迂曲里許文襄怒謂

鑾輅所經不由直路大不敬不急改必誅公曰豈

駕前有人持指南針直至丹徒不一轉灣耶倘

上聞發骸暴骼罪在公不在某卽幸而未知公獨無惻  
隱心乎道府咸駭引公謝公不肯且大言曰叅官已耳  
焉能殺我文襄無如何道卒不改臬司某喜訪察密檄  
逮丹徒惡戶拘至則農家良善人也縱之去會有事赴  
蘇臬司怒曰君識其爲善人而遣之策我不能耶公曰  
由府至司吏胥層層需索公卽訊而釋之而其家已破  
誣者之計得矣臬司瞿然爲之停訪又嘗云長官亦人  
也何必懼有患得患失心則面少人色將順不暇居官

風采可想見矣其言其事足爲脂韋者鑒

芝霞女史

象慧

明經女也適涇縣吳墨仙明府

斌咸工

詩詞明府任四川江津縣詞名課花酒帘滿庭芳云樓  
角斜飄簷牙半露幾番捲起炊煙有時風靜端正一竿  
懸比似麴車更甚遙望處無那情牽行沽去何須借問  
亞樹夕陽偏○堪憐最好是杏花開候春暖江天傍水  
村山郭做弄輕妍招引踏青人至同認取孤影翩翩只  
休教朦朧醉眼錯認燕飛前女史有芝霞閣詞卜算子  
云楊柳弄輕柔花落人消瘦杜宇聲聲聽已愁況是黃  
昏候○新月自娟娟不似眉痕皺曉起臨妝學畫伊得



展愁容否。桃源憶故人。云窗前。忽瀟瀟雨。對此暗添  
愁緒。點點何曾少住。況有芭蕉樹。○子規啼斷人何處。  
芳草遠迷歸路。簾捲落花無數。又是春將暮。

堦胡鑑校字

聽秋聲館詞話卷十

無錫丁紹儀杏船

聶冠卿於李良定席上賦多麗詞一時傳誦蔡君謨詩  
所謂多麗新詞到海邊天涯回首重依然也詞云想人  
生美景良辰堪惜向其間賞心樂事古來難是并得况  
東城鳳臺沁苑泛晴波淺照金碧露洗桐華煙霏絲柳  
綠陰搖曳蕩春色畫堂迴玉簪瓊珮高會盡詞客清歡  
久重燃絳蠟別就瑤席○有飄若驚鴻體態暮爲行雨  
標格逞朱脣緩歌妖麗似聽鶯語亂花隔慢舞縈回嬌  
鬟低鞞腰肢纖細困無力忍分散彩雲歸後何處更尋

覓休辭醉好花明月莫漫輕擲原本綠陰句下作蕩春  
一色緩歌句下作似聽流鶯亂花隔休辭句下作明月  
好花詞律謂蕩春一色費解一字乃誤多者聽字應讀  
平聲流鶯乃鶯語之訛明月句必是誤倒按此詞用入  
聲叶宋人往往以入作平與晁無咎平韻詞句讀不殊  
蕩春句各家平仄兩體均止七字無作八字句者萬氏  
所云不爲無見因思前段第二句美景良辰恐亦傳寫  
顛倒如作良辰美景則與各家平仄均協矣至晁詞首  
句各本作新秋近乃近新秋誤倒宋人填此調均仄平  
平起詞律謂起二字用仄者非

周美成製六醜調楊升庵嫌其名不雅改稱箇儂若不  
知宋人廖瑩中自有箇儂本調前後極整齊萬氏詞律  
因升庵所作雖用周韻而句讀參差祇知辨其錯謬亦  
不知調本箇儂詞係廖作其詞云恨箇儂無賴賣嬌眼  
春心偷擲莎軟芳堤苔平蒼徑卻印下幾弓纖跡花不  
知名香纔聞氣似月下筇筓蔣山傾國半解羅襟蕙熏  
微度鎮宿粉棲香雙蝶語態眠情感多時輕留細閱休  
問望宋牆高窺韓路隔○尋尋覓覓又暮雨遙峯凝碧  
花塢橫煙竹扉映月儘一刻千金堪值卸裊薰籠藏燈  
衣桁任褰臂金斜搔頭玉滑更怪檀郎惡憐深惜幾顫

彈周旋傾側碾玉香鈎甚無端鳳珠微脫多少怕聽曉  
鐘瓊釵暗壁按瑩中字群玉爲賈似道客乃宋末人升  
庵生有明中葉其爲竄易廖詞竊爲已作可知相傳升  
庵未貶時每闌入文淵閣攘取藏書妄意似此單詞世  
無傳本可以公然剽掠初不料二百年後原詞復行於  
世余嘗謂升庵得志決非純臣蓋自視過高意天下後  
世皆可欺其不爲無忌憚之小人也幾希

賀新郎調一百十六字或名賀新涼或名乳燕飛均因  
東坡詞而起其詞寄託深遠與咏雁卜算子云缺月掛  
疎桐漏斷人初靜時見幽人獨往來縹緲孤鴻影○驚

起卻回頭有恨無人省。揀盡寒枝不肯棲。寂寞沙汀冷。  
同一比興乃楊湜詞話謂爲酒間召妓鋪敘實事之作。  
謬妄殊甚。詞云乳燕飛華屋。悄無人。桐陰轉午。晚涼新  
浴。手弄生綃白團扇。扇手一時似玉。漸困倚孤眠清熟。  
簾外誰來推繡戶。枉教人夢斷瑤臺曲。又卻是風敲竹。  
○石榴半吐紅巾慙。待浮花浪蕊都盡。伴君幽獨。穠豔  
一枝細看取。芳意千重似束。又恐被秋風驚綠。若待得  
君來向此。花前對酒不忍觸。共粉淚兩簌簌。計一百十  
五字。竊意若待得君來向此。下直接花前對酒不忍觸。  
語氣未洽。必係花前上脫一字。雖韓滉詞此句亦僅七

字恐同一殘缺非全本也其蕊字乃以上作平與兩簌  
簌句中簌字以入作平同至卜算子詞或謂有女窺窗  
而作殆因溫都監女而附會之亦不足信一本靜作定  
汀作洲似不如人初靜與沙汀之善有謂雁不樹宿寒  
枝二字欠妥者不知不肯枝棲故有寂寞沙汀之慨若  
作寒蘆似失意旨

樂府紀聞言韓莊敏

續

有愛姬能詞公奉使時姬賦蝶

戀花云香作風光濃著露正恁雙樓又遣分飛去密訴  
東君應不許淚波一灑奴衷素僅三十字似係半闕故  
選家均未錄卽詞律亦祇收六十字一體然詞有單調

有雙調如南歌子本二十六字望江南本二十七字後  
加一疊卽爲雙調明女士張紅橋寄外蝶戀花云記得  
虹橋西畔路。郎馬來時。繫暖垂楊樹。漠漠梨雲和夢度。  
錦屏翠幙留春住。亦三十字卽謂爲單調似無不可有  
稱黃金縷者蓋取馮延巳楊柳風輕展盡黃金縷句名  
之又乾隆閒女鬼柳依依降乩賦詩一絕並詞云身裹  
絮綿難著枕。淡月鋪窗。亂寫飛花影。莫怪青春歸步緊。  
枝頭杜宇聲聲請。與紅橋詞正同依依順治初江都人  
方瓊室年十八遇亂被擄抗節而殞

天地生才每不可解粵西遠在邊徼士大夫工韻語者



尙有閨閣中殊爲罕觀乃會稽王笠舫大令集中傳有  
陸小姑者賓州人幼慧工詩適同里覃六六操農業嫌  
姑弱不任鋤犁之役給以母疾遣歸而別娶健婦姑弗  
與較藉吟咏自適有紫蝴蝶花山館詩一卷年二十八  
以瘵亡卒之日笑曰但吟詩句留青簡不與人間看白  
頭其志可哀已夫旣畀以才而又厄之如此豈佛氏因  
果之說信有之非世人所能測度耶盱眙汪孟棠觀察  
云任梓行其詩蕭山韓螺山中翰爲賦解語花云風酸  
繞指墨碎研心清露愁襟浣淚綃千片癡牛省應把鐵  
腸柔轉絲絲獨繭織不就鴛鴦衾暖聽小樓凍雨黃昏

紫燕單棲慣。○休說珠還璧返。問薜蘿消息。人隔天遠。

楚娥幽怨。難分訴。付與冷蘂枯管。秋蟬命短。慙猶帶殘

音淒顫。拚一場塵夢匆匆。留白頭誰看。

原註定有酸風繞筆頭研墨心

先碎集中句也

中翰名欽捷。南宮後以知縣用。請改中書。遂乞

歸。不出賦詩云。我比淵明見機早。未除彭澤已歸來。志

趣高邁。可想著有閑味。軒詞體物之工。不亞茶煙閣同

高茶庵咏。一萼紅云。罷梳妝。認香斑隱隱。汗粟透瓊

膚。豔借脂痕。穠分蠟印。密似勻綴。頰珠想午倦。微窗睡

足。挽細顆。紅襯簾紋疏。腕暈燈邊。腮霞鏡裏。薄醉還無。

○幾度蘭湯浴罷。看圓胎露潤。鮮荔含酥。並坐噴郎。輕

搔倩婢。暗裏偷解羅襦。只隔住。蟬紗一抹。曙星燦雲彩。  
罩模糊。好是蓉硝拍遍。涼逗冰蜍。

勒希姓也。太白詩。特生勒將軍。神力百夫倍。題爲歷陽  
壯士。勒思齊作楊升庵希姓錄。引之。乃刻本李集。訛勒  
爲勒。註李詩者。轉以升庵爲誤。不知明有勒璽。成化中  
進士。近見李小湖廷尉

聯琇

好雲樓集。附勒少仲觀察

方鐫

題亡室李紉秋手鈔詞卷。御街行云。浣花箋上簪

花字。賸留向人間世。瑤釵冷落玉樓空。愁絕餘香殘蕊。  
春樽孤館。秋燈長簾。多少思卿淚。○短緣歡夢隨流水。  
怕細憶平生事。十年塵鎖翠雲箱。腸斷蘭編重理。吟風

感月悲涼遺譜。吹得鶯笙碎。觀察新建人。著有樓州記。  
癸卯舉於鄉。現官江蘇。是勒姓。今尙繁衍可證。

楊蓉裳外祖官隴右時。每與署中親友拈韻徵歌。刊有  
荆園唱和集。今佚矣。中惟同邑侯春塘明經最多。最佳  
餘如武進楊容光。奎曙虞美人云。鎮垂簾。押留春久。開

過荼蘼後。階前檢點數叢花。無限銷魂。卻憶泰娘家。○

今年不似年時好。愁思催人早。韶光欲去總難留。始信  
人生須趁少年遊。婁縣楊簣山。之灝荔裳中翰省兄西

秦將聯騎北上。值其生朝。賦詞爲壽。金縷曲云。捉坐行

杯勺。祝華年。小蘇初度。略分今昨。原註蓉裳以十二月十八日生前坡公一

日荔裳以正月四日計就游梁辭祕省只算暫時休沐。漫  
日生後子由一日。惆悵鸞飄鳳泊似我浪遊三十載笑儒冠難悔從前錯。  
蠶絲吐苦纏縛。○茲行况復偕康樂。羨同車兄吟春草。  
弟吟紅藥。眺聽河聲兼岳色。好辦酒瓢詩橐橫短笛。爲  
吹飛鶴。儂自天涯泥絮滯。盼吾宗故事留臺閣。名山在。  
緩前約。金匱俞木庵。詞眼兒媚云庭院黃昏別緒濃。秋  
影小簾櫳。數聲寒杵。一弦涼月。幾點飛鴻。○無邊舊事  
憑誰省。閣淚對西風。彈阮無心。調箏轉怯。思夢還慵。春  
塘名士驤菩薩蠻云含情悄悄倚屏山立。清宵怕見如眉  
月。眉似月。纖纖愁痕夜夜添。○兩枝紅燭並。濃淡人雙。

影。驀地眼波回。相看轉自猜。浪淘沙云盼到柳條青。已過清明。落花如雨。聽無聲。不信一春憔悴意。單爲啼鶯。○斜月滿空庭。香霧冥冥。簾紋如水夜淒清。睡去總然無好夢。卻也愁醒。帆影南浦。云風正掛蒲高。認中流。片影參差來去。半幅淡相隨。澄輝裏。劃破幾重煙樹。迴攪。振柁沙灣。綠轉痕斜露。鷗倚鷺。翹渾未醒。已過蘆碕荻浦。○軟波帖帖輕移。漸微茫。遠逐閑雲飛度。殘照欲低時。江樓畔。應有銷魂人數。離情無據。一痕搖曳。留難住。霞斂遙山。奩翠暝。颺入月陰深處。均不涉浮豔。

楊蕊洲表姑

芸

爲蓉裳外祖女著有琴清閣詞與李紉

蘭女史

佩金

生香館詞盛傳一時海內推爲閨詞之冠

清平樂云茶香浥浥。花乳盈甌碧。露腳如煙吹袖溼。天  
淡星痕欲滴。○胡牀簟滑涼生。睡餘忽聽瓶笙。彷彿一  
池秋雨。風吹萬柄荷聲。題吳蘭雪新田十憶圖浣溪紗  
云記取文窗覓句遲。淺寒吹戶落花時。更無人處耐尋  
思。○旋拂香牋題豔字。漫拈紅豆譜烏絲。未妨閑事早  
鶯知。表姑適秦丈蘭臺有卜算子云紅蓼逐風開。黃葉  
因風起。燕子無情也解愁。絮話秋生矣。○漠漠露凝空。  
寂寂簾垂地。試掩屏山數漏聲。領略秋滋味。虞美人云  
梧桐葉上蕭蕭雨。絮盡寒蛩語。湘簾不捲篆紋斜。何事

秋來瘦影似黃花。○空庭獨坐添惆悵。試向雲邊望。三  
三兩兩雁當樓。今夜邊城夢裏有歸舟。丈名承需官通  
州知州所作無多故詞名轉遜閨中

表姑次子

恩普

官江西同知娶楊伯夔表丈女佩貞

琬

亦工詞善書昔於顧羽素表姑綠梅影樓填詞圖中見  
所題高陽臺云盡閣連雲疎簾隔夢人間無此高寒石  
瘦苔荒一輪凍月團圓悄然萬籟聲俱寂恁煙痕綠上  
毫端對橫枝依約微吟畫損闌干○深宵不用銀缸照  
愛橫斜疎影寫向冰絃彷彿瑤妃半鬟香霧初乾披圖  
忍讀琴清句侍慈幃畫卷曾看聽煙梢翠羽飛來同話



辛酸。輕清婉約克紹家風

余前謁芝仙姑於嘉禾知有雙清閣詩匆匆返櫂未及  
請讀後爲子宣姑夫攜置行篋杭州陷竟歸浩劫鈔撮  
叢殘僅存十一然如贈潤卿妹七絕云茜衫翠袖影伶  
俇巧掠飛蟬薄鬢青良夜似年秋似水笑攜團扇撲流  
螢又題馬誦光伯母遺照五古中云我痛雁行斷嫂傷  
鸞影沉奔喪歸吾家血淚盈衣襟但得死同穴奚必生  
同衾清操潔比瑜烈行堅如金含悲赴九原柏舟遂素  
心等句清蒼絕俗正不必以多爲貴姑工書嫻繪事有  
三絕稱所臨靈飛經見者謂長洲曹墨琴夫人不得擅

美於前曾隨宦滇南趙北復自澗右避亂閩中。游歷幾  
萬里。游經變故。吟咏遂罕。幼在都中。曾執贄楊蕊淵表  
姑。故偶作小詞。亦有原本如憶王孫云。梧桐分綠上雕  
欄。幕捲簾垂。夜未闌。玉骨珊珊。慣耐寒。掩青鸞。絕代蛾  
眉。稱意難。辛卯七夕。濮又昭妹招諸女伴。作乞巧會。小  
病未往。賦詞奉柬。金錯刀云。雲影淡。露華涼。蟲聲如雨。  
夜初長。尋盟有約。邀新月。乞巧無緣。炷晚香。○陳鈿盒  
奠瓊漿。一燈搖夢。費思量。遙知語笑情方愜。都向天孫  
問七襄。姑見示靈飛經書冊。中有暢之叔題五律二章。  
云之子吾宗秀。風華冠玉臺。雙清多慧業。三絕是仙才。

朔雪澄懷抱南雲妙翦裁探奇恢眼界又渡淞江來記  
得都門別于今卅載強容顏俄老大身世劇蒼涼聽雨  
情同洽挑燈話轉長春流引歸棹寒雁倏分行叔氏著  
述悉遭賊燬幸存片羽無異兼金矣

東坡集載哨徧二闕一隱括歸去來詞一賦春宴云睡  
起盡堂銀蒜押簾珠幕雲垂地初雨歇洗出碧羅天正  
溶溶養花天氣一霎時風迴芳草榮光浮動卷縐銀塘  
水方杏靨勻酥花鬚吐繡園林紅翠排比見乳燕捎蝶  
過繁枝忽一線鑪香惹游絲晝永人閑獨立斜陽晚來  
情味○便攜將佳麗乘興深入芳菲裏撥胡琴語輕攏

慢撚總伶俐。看緊約羅裙。急趨檀板。霓裳入破。驚鴻起。  
正顰月臨眉。醉霞橫臉。歌聲悠颺。雲際任滿頭。風雨落  
花飛。漸鴉鵲樓西。玉蟾低。尙徘徊。未盡歡意。君看今古  
悠悠。浮幻人閒世。這些百歲光陰。幾日三萬六千而已。  
醉鄉路穩不妨行。但人生。要適情耳。雖兩詞平仄句讀  
均有出入。而字數則同。詞綜於顰月句上落正字一霎  
句時字作晴。均誤。汲古閣本時字作暖。換頭句作便乘  
興。攜將佳麗。花飛下多墜。字紅翠作翠紅。悠颺作悠揚  
亦非。颺字應讀去聲。此調宋以後作者絕少。荆溪周保  
緒教授濟賦秋興云。黃葉半林。黃菊半籬。妝點秋如許。

莽西風千里捲平蕪。乍登臨。江山吳楚。問西塞煙波。東  
山裙屐。幾曾留得南朝住。回首廣陵濤。年年只背蕪城  
斜日東去。帶邦溝。流恨滿江湖。共估客。愁心亂。檣烏爛  
錦韶華。海蜃樓臺。畫屏歌舞。○呼。痛飲張翰。生前杯酒  
澆黃土。休落龍山帽。金城楊柳誰賦。任飄泊。蘭成家山  
重到。也難寫。出關河暮。天際雁行斜。知他暝宿。荒蘆叢  
荻何處。漸鳴榔。聲斷野煙鋪。賸一點。漁燈伴星孤。月初  
弦輕雲低護。柴門歸便深掩。無賴是庭梧。蕭蕭只管打  
窗縈砌。不管離人離緒。閒牀倦枕。漫支吾。怕重陽滿城  
風雨。句讀叶韻係用蘇公隱括歸去來詞體不支不蔓

直可追步坡塵

語云管得住身管不住心又云丟了青竹杖忘了弄蛇  
時皆俗諺也教授衍爲虞美人後結云畱住花枝畱不  
住花魂又云纔得春晴都不記春寒讀之清雋輕圓初  
不覺其意在諷刺教授登嘉慶乙丑進士司鐸淮安晚  
歲寓居江甯有止庵詞蝶戀花云絡緯啼秋啼不已一  
種秋聲萬種秋心裏殘月似嫌人未起斜光直透羅幃  
底○喚向閑庭看露洗薄翠疎紅畢竟能餘幾記得春  
花真似綺誰將片片隨流水綠陰玉京秋云春乍去金  
鈴繫高閣綵幡虛護幾許嫣紅霎時吹盡何關風雨多

謝疎簾影。面面遮斷。送春心緒。鶯休語。不知誰在綠窗  
深處。○一枕香迷蝶翅。向西園。餘情更苦。記得那回青  
驄嘶過。靡蕪橫路。忘却珊瑚墜。爲憶樓上。盈盈眉嫵。空  
凝佇。惟有垂楊慣舞。言外俱有意在。

南宋詞家推姜白石爲巨擘。故鄱陽產而居吳興。吾友

陳叔安明府

字

亦家鄱陽。流寓金陵。後沂江入粵。重游

鄱之東湖。湖有浮舟寺。感賦垂楊云。鶯黃細縷。看繞堤  
已報。早春煙樹。醉上湖亭。廿年重到。愁如許。依然飛燕  
尋門戶。杖藜有過橋漁父。訴歸來。鄉語生疎。問舊巢何  
處。○閑對雲堂佛古。聽茶版清晨。飯鐘當午。故國詞仙

勝情偏愛吳興住。輕拋里巷。經風雨。暗惆悵。遠遊意緒。  
甚明朝。又掛征帆隨雁去。其浮家浪跡。殆與白石有同  
慨。今老矣。猶羈滯。聞中藉詩詞。自遣著有。翦梅詞。荷葉  
杯。云昨夜。盡樓相對。微醉。銀燭兩行明。憐他珠淚。背人  
傾。不覺惹離情。○漏盡曉鶯先唱。惆悵。歸夢太匆匆。一  
輪初日射窗紅。門外又東風。泛舟秦淮。夢芙蓉。云檻燈  
涼。映水。漸雲微星淡。月斜風細。輕舟滑笏。今夜定須醉。  
故人招一二。還隨鷗鷺三四。柳拂萍開。趁明波倒影。卻  
見畫闌倚。○翻笑尊前眼底。點染溪山。總仗笙歌沸。香  
消玉珣。千古斷腸地。小樓雙燕子。年年空傍珠翠。只有



斜陽照胭脂井畔。嬌豔恨無比。點絳脣云。煙斂風柔。漫  
憐芳草。搖晴碧。兔葵燕麥。多少傷心客。○依舊人家。不  
見香車跡。游春屐。十年輕擲。雙鬢新來白。喝火令云。魯  
酒休嫌薄。秦箏且爲歡。眼前不耐是春寒。待到鶯簧暖  
日。花信又將闌。○影事分明在。腰圍逐漸寬。別時容易  
會偏難。但問幾重流水。幾重山。但問新來燕子。知否舊  
門欄。叔安與保緒。交最洽。故詞筆頗相似。

乾嘉之際。江浙畫家。以奚方錢改四布衣爲最。均能書  
工詩詞。奚名岡。字鐵生。新安人。寓居杭州。題郭頻伽盟  
鷗圖菩薩蠻云。遙知白石尋盟處。蕭疎楊柳垂煙幕。分

得白鷗沙。一溪紅蓼花。○輸君攜野艇。幽夢和愁迴。墮  
意與題詩。雨斜風細時。方名薰字蘭。坻石門人與鐵生。  
咸善山水。短檠滿江紅。云獨夜誰親。惟雁足。光搖耿耿。  
頻數盡。寒更三五。歌殘酒醒。有客臨書東。舍火何人背。  
雨西窗影。恁關情。一片玉荷前。閑愁并。○射簾額。晴虹  
間。黏燭淚。飛蛾粉。照此時。幽獨。寸心堪省。素雪將侵。潘  
岳鏡。黑甜未遇。盧生枕。只消磨。風露憶中宵。秋雲冷。錢  
名榆後。改名杜。字叔美。自號松壺小隱。仁和人兼擅花  
卉。爲改七薌。畫石梅結宇。圖題詞索和百字。令云石巢  
雲壑。付幽人管領。一圍晴雪。只五柴門寒不掩。夢穩羅

浮仙蝶。翠羽穿簾。紅藤壓架。松火窺簷活。炊煙林際。山  
童掃徧殘葉。○最憶前度清游。打頭松子。空翠涼肌骨。  
剗地東風啼鳥換。棖觸舊懷重疊。結箇茅亭。與君共住。  
閑聽鐘魚發。梅花如此。爲君圖畫。風月。改名琦字七薌。  
其先西域人。祖某爲松江叅將。遂家華亭。琦始棄武而  
文。喜寫折枝。繪仕女尤妙。菩薩蠻云。畫船來往紅橋路。  
依依垂柳濛濛絮。化作白蘋花。花開傍那家。○流螢三  
五點。搖曳水紈扇。扇底一分人。和他月二分。和錢松壺  
爲作石梅結宇圖。題詞見贈。次韻百字令云。碧山人去。  
甚東風吹老。枝枝香雪。曳杖拖屨。看暝色。瘦步又隨寒。

蝶松影如潮藤陰拂檻綠靜茶煙活疏林殘照打頭飛  
下黃葉○此地小住游仙初平叱起頑石皆仙骨縛箇  
香茅清澗曲卧對雲屏千疊翠袖攀蘿紅螺過酒繞屋  
梅花發手攜鴉嘴破空飛上明月四君盡理俱以閑逸  
疎秀擅場詞亦如之

江甯吳伯鏌大令

國俊

爲蘭園大令子袁蘭村大令壻

學有師承顧屢試不售俯就鹽筴官浮沉閩中久之權  
福清令旋卒爲人醇樸無城府與余交垂十年輕不肯  
以所著示人人亦無知之者歿後其子

師曾

始以全稿

見示客中春感祝英臺近云雨如絲風似翦閑向曲闌

倚新碧潭潭。春色已如此。看他雁齒橋橫。鴨頭波漲。且  
莫負。流鶯聲膩。○游倦矣。可堪無定浮踪。依舊泛萍似。  
帆飽舟輕。又把水程記。誰憐一樣韶光。及時游冶。終不  
是。故園情味。興宜泉明府。以自題停琴待月圖見寄索  
和依調奉答金縷曲云。一幅吟箋寄。是河陽。風流仙令。  
盡成詞意。苔徑幽深。松菊茂。香露暗滋。濃翠。賺人與。胎  
禽無寐。撫罷水絲虬漏悄。盼涼蟾。花外來猶未。拚獨向。  
石牀倚。○勝遊欲記。渾難記。悵年年。萍飄沙散。人生能  
幾。利繫名羈。還自笑。漫說歸尋煙水。且料理。琴樽同醉。  
古調重彈。誰解聽。算多情。只有嬋娟子。休隱在。碧雲裏。

跡其意境無異松濤梅影

伯鏐配紫卿夫人

綬

袁子才太史孫女也亦工詞余祇

見其題嚴小秋詞稿高陽臺云摘粉搓酥吹花嚼蕊吟  
窗細寫深情款夢梅邊冷香吹入瓶笙賭茶舊事空棖  
觸怕拈來紅豆零星怨東風謝了荼蘼催老啼鶯○傳  
經我愧承家學聽河陽花滿小隔趨庭見說仙才辦香  
曾證山靈華年銷盡輪蹄鐵牘新詞爭唱旗亭澹吟懷  
一抹遙峰冷暈螺青伯鏐亦有題詞同倚是調而風神  
轉遜余曾戲謂伯鏐就二詞論君合向妝臺拜女先生  
也夫人著有簪筠閣詩于歸後二日對鏡云曉起窗前

整鬢畫眉深淺入時難鏡中似我疑非我幾度低徊  
不忍看情致絕佳時有浦合雙女士夢珠和蘭村大令

憶昔詞臨江仙云記得纔笄侵曉起畫眉初試螺丸春

痕淡淡上春山乍驚新樣窄較似昨宵彎○一樣敷來

仙杏粉難勻怪煞今番傳聞郎貌玉珊珊妝成嬌不起

偷向鏡中看與夫人詩異曲同工又一闕云記得傷春

經病起日長慵下妝樓慧因悔向隔生修草偏栽獨活

花未折忘憂○尺幅生綃窗下展親將小影雙鉤畫成

未肯寄牽牛只緣描不出心上一痕秋視崔徽寫真寄

裴更進一意倍覺淒豔動人夫人族妹黛華青適上元

車子尊明經有燕歸來軒稿寄竹畦兄吳下渡江雲云  
家山催別去尺書莫寄彈指又驚秋幾行新雁外日極  
征帆底事久淹留勞人草草怕年來雪漸盈頭應試看  
白蘋洲畔樓穩有沙鷗○優游真娘墓側白傅祠邊共  
尋花澆酒更龍門叨陪清譙文采風流烏絲寫出琳瑯  
句聽雙鬟嬌囀歌喉旗亭壁有誰爭畫銀鈎

詩貴用韻韻宜穩宜響不響則雖首尾完善中有好句  
終覺口齒滯澀詞韻雖寬於詩然有一句兩句句句用  
韻者有多至數句方用韻者一韻不響通篇減色矣仁  
和高茶庵明經望曾與譚君仲修先後遊閩均工長短



句仲修善小令茶庵善慢詞其押韻尤響南湖懷古探  
春慢云流水當門亂山繞郭危亭高聳雲表款竹尋僧  
穿林訪豔幾度吟踪曾到十里香塵路更誰識故侯園  
沼一袈裟地猶存粉圍香陣都杳○休問平原野老歎  
玉照堂敲空牘斜照斷塔埋煙殘碑蝕雨滿目萋迷荒  
草一覺繁華夢悵回首劫灰如掃惟有梅花迎人依舊  
含笑題金冬心畫梅隔溪梅令云一枝瘦骨寫空山影  
珊珊猶記昨宵花下共憑闌滿身香霧寒○淚痕偷向  
墨池彈恨漫漫一任東風吹夢墮江干春殘花未殘十  
四寒啞韻也押之妥協便有餘音如易前詞杳韻作渺

意則猶是而韻啞矣

嘉善柯寓匏舍人

崇樸

由貢生官中書竹垞太史詞綜

凡例中言銓次詞人爵里論世之功寓匏爲多又山陰

吳君琰青

秉鈞

曾遊嶺南叅訂萬氏詞律二君工詞可

知王氏詞綜均遺之柯有遂次大雪瑣窗寒云雲態飄  
颻風情搖蕩做成花片憑高試眺不覺遠山遮徧看林  
臯瓊英亂飛幾回錯認梨花院想廣陵潮湧我媚月起  
銀河光漸○堪歎浮名絆笑一棹天涯孤征如雁香溫  
繡閣誤卻謝庭芳宴問而今蘆荻滿洲可能得似山陰  
岸只應同裴笠衰翁獨釣寒江畔吳有海棠春云昨宵

枕上凝紅淚。聽雨打。芭蕉葉碎。漏盡峭寒生。夢破燈花  
墜。○曉來正憶相思味。被鷓鴣笑人孤睡。強起畫雙眉。  
減盡春山翠。雨後望漢江。新漲滿江紅。云幾片春雲輕  
染就。一江新碧。高樓下。蒼茫萬頃。光浮翠壁。鵲踏岸花  
紅有暈。燕窺堤柳青無跡。看南山影落。翠霞斜。水輪出。  
○微風起。煩襟滌。朱闌外。誰家笛。聽棹歌聲在。滄浪之  
側。細縠生時。和雪縐。洪濤捲處。兼天白。羨漁舟釣叟。把  
魚竿。情偏適。

聽秋聲館詞話卷十二

無錫丁紹儀杏舲

綿州李雨村觀察

調元

所刊函海一書蒐采升庵著述

最多惜校對未甚精確其自著童山詩文集亦不甚警策詞則更非所長惟浣溪紗云斜掩金鋪日影移水晶簾子鎖垂垂楊花偏傍繡幃吹○玉步搖敲籠鬢嬾金泥裙卸整腰遲春愁一片化遊絲謁金門云風過處吹落一庭輕絮幾陣廉纖窗外雨綠迷芳草渡○纔見蜂酣蝶舞又早燕來鴻去試問落花誰作主流鶯嬌不語爲集中之最觀察弟墨莊名鼎元官宗人府主事咏闌

千金縷曲云婉轉情何極。襯花陰春藏幾許。蝶蜂曾識。  
曲。衆玲瓏呈幻影。低護青青草色。正睡起。海棠無力。偏  
共柔腸爭九轉。便陽烏。午影扶難直。桃源路。一灣隔。○  
玲。塤鶴步還愁入。算惟有。槐邊蟻度。柳邊鶯織。月夜縱  
橫添斷竹。羽客憑虛弄笛。早絆住。花間遊屐。酒點茶痕  
人去後。更誰憐。粉睡黏塵跡。留淺蔭。蘸苔碧。音情瀏亮  
頗能體物而不滯於物。

孫文靖

爾準

論詞絕句云作者誰能按譜填。樂章琴趣

調三千誰知萬首連。城壁眼底無人識。晚仙蓋爲吾鄉  
王晚仙進士。一元作晚仙寄籍奉天。冒吳姓舉京兆康

熙癸未捷南宮工駢體文善倚聲所作幾萬首顧自來  
選家咸未錄及里中人鮮有知其姓氏者余亦僅見咏  
物詞一卷簷鐵蝶戀花云輕脆琉璃剛徑寸慣向虛檐  
弄盡悠揚韻疑是簾鉤垂未定勞他燕子驚心認○旅  
館黃昏鄉夢近薄醉醒來徹耳西風緊月又朦朧燈又  
燼生生引起離人恨漁蓑水龍吟云離披翠結香莎攜  
竿逕上扁舟去醉來卧月晒來隨網浪花深處新婦磯  
頭女兒浦口白蘋紅樹任瀟湘歸晚都教溼透收不了  
煙和雨○歷盡風波幾許好忘機狎他鷗鷺繞看水濺  
還經雪打蒙鬆如故鱸美蓴香借渠拋卻閑愁無數向

嚴灘笑煞羊裘多事釣名千古。睡燕沁園春云營罷新  
巢。王謝堂前。午風正微。爲春光澹宕也。如人倦。餘寒料  
峭。嬾逐鶉啼。學得鴛鴦。迷他蛺蝶。交頸雕梁。暫息機。酣  
眠好。喜纖塵不動。穩稱雙棲。○夢中猶自交飛。怪海國  
冥冥頃刻歸。想烏衣巷口。舊遊恍惚。昭陽殿裏。往事依  
稀。掠水還驚。蹴花終幻。可似邯鄲去路迷。簾櫳畔。被鸚  
哥喚醒。怨煞斜暉。螢火金縷曲云。點破空庭。暝看熒熒。  
乍高乍下。飄搖不定。草際浮生原是寄。偏帶空明心性。  
愛依託。花堦苔徑。最好露涼雲淨候。一星星。撩亂梧桐  
井。疑暫斂。又相映。○疎簾小幔。黃昏靜。惹佳人。輕羅扇。

子撲來妍靚。幾度半明還半滅。照盡空閨幽景。遮莫賽蟾光鳳脰。隋苑只今秋寂寞。牘餘輝。還伴書幃冷。應不怕晚風緊。言外均有意。在非漫然咏物而已。

蘭泉司寇輯國朝詞綜。凡未詳里居時代者。均彙列四十六卷中。錄冒襄浣溪紗云。翠被生寒寶篆斜。銀荷半炷透窗紗。舊時閒事記些些。○嬾向重幃鬆釵領。誰來隔院理琵琶。自攜殘蠟照梅花。不知褒姒如皐人。爲冒辟疆弟王柳村豫江左詩徵曾錄其詩。辟疆子丹書字青若。亦工詞。有菩薩蠻云。金鈴送響秋風至。來鴻淡寫長天字。字寫不成書。空勞度碧虛。○井梧飄斷梗。素月



橫清影。照影可曾雙。含羞掩綠窗。辟疆爲國初四公子  
之一家有水繪園陳其年太史未達時館園中最久當  
有唱和余前見同人集中附辟疆詞數闕惜未錄

嘉善諸生邵嬾漁

豐城

著有蕉隱詞郭頻伽謂爲頗有

作意因錄其秋草臺城路於詩話中余喜其小詞尤雋  
永清平樂云茫茫如此沒箇埋愁地啼鳥驚心花濺淚  
又是瘦人天氣○年年誤了春光枉教迴盡柔腸獨倚  
危闌凝睇愁邊賸有斜陽

長白麟見亭河帥

慶

曾以遊歷所至分繪爲圖名曰鴻

雪因緣自爲之記並囑吳門戈寶士明經各附一詞於

後長洲陶鳧宗伯

標

則舉生平境遇自繫以詞寓編

年紀事於協律中實爲詞家創格今紅豆樹館詞五六  
兩卷是也其記嘉慶癸酉逆賊林清遣其黨陳爽陳文  
魁潛結太監閤進喜等突入大內滋事百字令云刀光  
如雪鍾驚魂一霎頭顱依舊祕館校書剛日午猝遇跳  
梁小醜義膽同拚兇鋒正銳血濺門爭守狼奔豕突半  
空霹靂驚走○更遣飛騎訛傳款關諜報匪黨還交構  
往事思量成噩夢差幸餘生虎口淨掃欃槍肅清輦  
轂功大誰稱首神槍無敵當今

聖武天授時宗伯以編修在文穎館編校全唐文賊持

刀入供事倪大銓蘇壽戴杰暨茶房李得均被戕家人  
駱升徒手格鬪賊砍其五指去

仁宗方狩木蘭倉猝閒禁兵未集

宣宗留守大內發槍斃賊賊始驚又值雷雨交作遂遁  
巨魁旋即授首宗伯詞作於道光中故有當今天授句  
昔人稱少陵韻語爲詩史此詞正可作詞史讀也

宗伯少從王蘭泉司寇遊會預訂金石萃編渤海詩傳  
詞綜諸書嘉慶戊辰入承明出爲清河道被黜復起由  
大名守擢荆宜施道再黜再起分巡漢黃旋授江西廉  
訪內升至少宗伯遇人和藹性尤愛才在任無赫赫名

而去後每有餘思嘗謂余 國朝法度最良最備但能

謹守爲治有餘血氣盛時尤不宜好名喜事彼以興革  
爲能弊與玩愒者等時余年未及壯忽不爲意由今思  
之旨哉斯言宗伯詞已錄入王氏詞綜二集嗣合晚年  
所作總爲八卷內有題李海鵬方伯

宗傳

滄海釣鼇圖

水調歌頭云至理在觀海且作釣鼇看滄桑幾經變易  
今古一漁竿莫問驚濤萬派好趁長風萬里隻手障狂  
瀾太白有奇句嗣響在人間○指蓬島雲霞外杳難攀  
中流容與自在此卽是仙班君有絲綸待用定許垂虹  
天半連六聳奇觀我亦悟秋水妙緒起無端時山左周

敬修制軍

天爵

官兩湖政尙嚴刻方伯時與牴牾宗伯

方任荆宜以荊州府築堤違式牽連被劾在他人必有  
未能忍然者乃以妙緒起無端十字談笑道之守大名  
時曾輯畿輔詩傳詞綜補遺二書刊以行世方伯桐城  
人工古文由戊午副貢生官知縣洊陟楚藩旋乞病歸  
余謁方伯甫數面卽檄權東湖縣事余受代而方伯行  
矣今訪求遺文竟不可得深用悵然

余最喜六合汪紫珊太守

世泰

含暉樓酒間偶述更漏

子云喚黃嬌酬白墮莫負紅窗燈火銀漏轉玉繩低今  
宵是幾時○今宵事前年似禁得幾番彈指休只是話

從前尊前正可憐。逸響淒音。感均頑豔。含暉樓者太守。  
寓秦淮。時館吳妓陳桂林。處並爲易名。月上費纏頭。無  
算。而月上意不屬。卒從他人去。太守曾集袁蘭村劉芙  
初汪穀樓汪小竹楊伯夔顧兼塘詞。並已作爲七家刊。  
附隨園各種後。其自著碧梧山館詞。河傳云。曾記花底。  
試燈時節。嫩寒天氣。玉簫聲裏。畫簾垂。停杯。春愁堆兩  
眉。○分明謎語。尊前遞。佯不理。教會千金意。那時情。最  
瞢騰。而今夢涼。何處溫。踏莎行云。鬪草初闌。簸錢方倦。  
爲誰悄步。閑庭院。簾垂銀蒜。靜無人。杏梁棲燕。聞微嘆。  
○燭折簷花。故添鑑象。依依欄角。迴身緩。怪他楊柳。枉

多情低迷難把離魂綰。均極幽峭。獨出關經南天門作  
百字令云。草枯沙白。恁出關秋色。蒼涼如此。車鐸郎當  
投古戍。何處明駝先繫。一片悲笳。數聲斷角。吹落斜陽  
紫昏星未上。滿衣多是霜氣。○指認千尺危崖。青蒼崩  
另似阻南來騎。冷翠壓車登不易。仰首人行天際。紅柳  
蕭蕭。朱旗閃閃。門掩黃雲裏。舉鞭試叩。皂鵬足下。騰起  
爲集中變調。太守娶袁子才太史女家。本素封。入貲得  
知府官。河南不得意。乞歸。道光中。余晤其弟世澤於楚  
知已作古家亦落矣。

康熙間有兩邵青門。均工詩。均爲諸侯上客。一名陵字。

湘綸常熟人董曉滄東皋雜鈔錄其秋柳金縷曲云萬  
樹黃金線最無端送春辭夏垂垂欲倦一自漫空飛絮  
盡多少朱門晝掩便背了東風一面記得清明寒食路  
倚纖腰亂拂桃花片又勾住畫梁燕○如今拋擲情何  
限賸幾枝冷煙疎雨水村茅店六代山河斜照裏無數  
暮鴉棲徧又何處笛聲哀怨淒絕右丞三疊句任行人  
唱煞無人管長亭路共天遠一名長蘅字子湘武進人  
有青門詞長相思云槿花開菊花開楓落吳江客未歸  
涼宵旅思催○砧聲哀角聲哀殘月風櫺旅夢回高樓  
聞雁來如夢令云輕暖輕寒時序憎暖憎寒情緒日晏



未梳頭。脈脈倚闌無語。無語。無語。風送一簾紅雨。鵲橋  
仙云。楊花如雪。桃花如雨。簾幙盡教高捲。芳洲一帶草  
痕齊。早青到。姑蘇臺畔。○催歸杜宇。重來燕子。惹起鄉  
心。歷亂。憑闌干。疊暮山稠。剛抵得。春愁一半。

張瑤星

怡

原名薇。桃花扇傳奇中所謂老道士也。讀畫

錄載其題畫卜算子云。冉冉綠陰中。位置層軒好。松外  
亭空天更空。天濶孤鴻小。○石壁絕攀躋。可有幽人到。  
壁後還藏千萬峰。峰際閑雲繞。頗有出塵之概。

明季兩奇女均出蠻荒。一爲雲驪娘。款鄺湛若

露

掌書

記。鄺著赤雅一書成之。蠻洞中一爲秦良玉。曾率兵勤

王獻賊橫行時保石砧境卒無恙許克孳明經題雲彈  
娘傳後齊天樂云蘆笙吹綠珠厓草人來鬼門秋暮洞  
雨飛符林雲合陣兒女英雄如許天魔罷舞悵破碎中  
原幾聲杜宇一隊天姬月明聯臂踢歌去○翩翩書記  
老矣歎功名事業無分銅柱赤雅編書黃衫說劍酒畔  
愁聽蠻鼓沈湘萬古只粉黛當年也歸塵土彈斷冰絃  
海空聞雁語錢謝庵吏部題秦良玉遺像金縷曲云明  
季西川禍自秦中飛來天狗毒流兵火石砧天生奇女  
子賊膽聞風先墮早料理夔巫平妥應笑督師無將略  
念家山只怕荆襄破妄男耳妾之可○蠻中遺像誰傳

播想沙場弓刀列隊指揮高坐。一領錦袍殷戰血。襯得  
雲鬟婀娜。更飛馬桃花一朵。展卷英姿何颯爽。論同名。  
愧煞甯南左。軍國恨。尙眉鎖。良玉媳名紅蘭。歿於陣。惜  
無人。咏歌其事。相傳嘉慶中。教匪林之華。將犯石砭。有  
老儒謂眾曰。毋恐我能退賊眾。以其素不妄語。疑信參  
半。一日賊至。見一山頗峻。山腰草木蒙茸。雲氣滃鬱。中  
一白鬚翁。方巾道服。閉目坐石上。以麈尾麾賊。呼之華  
名曰。此地非爾曹可到。速返。不然無噍類矣。聲音朗暢。  
賊驚羅拜。叩之復閉目曰。去去。於是賊傳仙人有指。終  
不敢至。石砭境蓋卽老儒所爲人奇事奇。因並誌之。

陽湖左杏莊中丞

輔

初任合肥令。坐誤復起。仍宰合肥。

游升湖南巡撫。所至官書皆自治。少時與洪稚存、太史、孫淵如觀察相徵逐。官最顯。而文名遠。不如著有念宛齋詞、蘇幕遮、云玉波寒、羅袂溼。怕上高樓。閑並秋千立。衣蝶香銷。簫鳳澀。好夢都闌。鬢影風吹急。○悄難言。愁不歇。此意沉吟。畢竟和誰說。要識阿儂心。曲折除向迴廊看。取闌干月。秋柳同錢黃。山賦調寄垂楊。云年華易老。看碧柳依依。得秋何早。春水樓臺。也會好夢勾留到。芙蓉泣露。臨清曉。盼不著。一絲顫裊。牘空條帶。箇歸鴉。更襯些衰草。○況是離愁難了。趁古堠殘霜亂山斜照。

那不銷魂者。般憔悴。原知道。相看漫訝煙痕少。是鏡裏  
春人畫稿。問可能。風信吹回依舊好。

黃山名季重。鷓鴣天云。策馬年年意未降。倦游何處覓  
歸艖。幾時載酒攜紅袖。終日焚香坐碧幢。○尋杜若。採  
蘭荳。清宵怕見影雙雙。纔能炙得燈兒黑。明月無言又  
到窗。同時徐仲平治中。準宜鵲橋仙云。午風釀暖。暝陰

送冷。做得韶光如許。一分絲雨。二分煙。還逗起。十分愁  
緒。○無情春去。有情人苦。飛燕雙雙自舞。思量無計阻  
春歸。空目斷。連天芳樹。二君均籍陽湖。筆致頗相似。然  
一悲春去。一憎月到。感今懷昔。情景自殊。

中丞女孫笑江夫人

錫璠

工書嫺繪事適袁詒庵觀察

琴鳴瑟應致相得也不數年觀察殞匪難故鄉又經賊  
燬夫人寓閩中拮据支持其遇有甚難堪者然茹荼集  
夢中不廢筆墨所著紅蕉仙館詞眼兒媚云清淺銀河  
淡不流風軟笛聲柔一彎新月半窗燈影無限離愁○  
惜分偏是多離別此恨幾時休惱人春色撩人花氣蕩  
漾簾鉤清平樂云秋風蕭瑟觸耳蟲聲急花影橫窗燈  
照壁添倍淒涼顏色○年來別思頻添愁生兩葉眉尖  
試問樓頭明月清光卻向誰圓蝶戀花云月過西窗涼  
似水人在天涯秋在蟲聲裏一院溼煙飛不起臨風咽

盡相思味。○珠楮玉欄閒徙倚。良夜迢迢。欲遣愁無計。  
卜得燈花私自喜。無言悄把湘絃理。梅爲風雨所敗。感  
賦疏影云。一宵風雨。早小園梅萼飄墜無數。纔見花開。  
又見花飛。瞥眼便成塵土。但教落去人知惜。更何必重  
幡深護。祇愁他。沒箇人知。枉自魂銷千古。○日暮。幾回  
巡索。嘆繁華如夢。韶光迅羽。乍霽仍陰。似暖還寒。種種  
惱人情緒。天心到此。應難問。漫惆悵。留春不住。看枝頭  
點點殘英。空牘寒香一縷。

觀察女毓卿女史

子芳

秉夫人教亦工詞能畫題楊柳

海棠便面菩薩蠻云。嬌紅穠綠天然麗。一般沈醉東風。

裏莫漫倚新妝。纖腰爾許長。○眉痕青瑣瑣。睡起情無  
那。留得幾多春。湘毫染未勻。如夢令云。夢壓鸞衾初醒。  
睡起玉釵慵整。門掩篆香殘。長日畫堂人靜。風緊。風緊。  
吹縐一簾花影。南歌子云。秋老蛩吟咽。天寒夜氣清。一  
庭風露靜無聲。不道月痕斜轉。已三更。○寶鼎香將燼。  
簷花影漸橫。羅衾如水悄寒生。閑把迢迢蓮漏數分明。  
女史年甫逾笄。所詣正未可量。

東鄉吳蘭雪刺史

嵩梁

詩詞清綺嘉慶庚申舉於鄉官

中翰十餘年始出爲黔西知州著有香蘇山館詞秋夜  
聞笛浪淘沙云何處玉玲瓏。徑轉廊通。尋聲直到畫闌



東月又不明。簾又暗。燈影微紅。○繡榻亂書叢。人坐當中。一篇新譜教纔工。誰信桂花庭院裏。立盡斜風。將赴粵東。畱別閨人采桑子云。一春夢繞珠江路。才定行期。又改行期。生怕嘗新過荔支。○明朝真箇搖船去。細算程期。預訂歸期。約在梅花破蕊時。崇效寺看牡丹。天香云。穀雨初晴。茶煙正午。小窗深院岑寂。寫記前遊。重邀俊侶。來問牡丹消息。萬花低首。讓一朵。鞞紅先坼。香徧人間。應是露氣日華雲液。○臘粉零珠誰惜。占金閨。果堪傾國。知是幾生豔福。修來纔得。綵筆昨傳佳夢。恁管領春風推第一。不許仙心。再傷淪謫。刺史少日遊大江。

南北風流佚宕人爭延許顧無所遇其感舊絕句云建業姑蘇又廣陵當筵綵筆最飛騰誰知縱飲酣歌地中有唐衢淚數升余每誦之不勝淒黯

綜古今詩詞而論列之貴有特識尤貴持平若於古人寓微詞而於近人多溢美適形其陋而已樊榭論詞古多今少最爲醇正朱小岑論詞古今各半其謂美成鋪張可厭已屬非是且取乃父詞論之尤覺悖理吾鄉孫文靖論詞雖古少今多然皆堪以論定之人至尤二娛論詞多同時朋舊乃懷人詩耳小岑臨桂布衣名依真余輯詞補獨闕嶺右覓其詞與朱百韓謝良琦暨女士

梁月波詞咸未得殊以爲憾。二娛名維熊長洲人由拔貢生官訓導薦擢蒙自知縣逾年乞病歸甫及中壽遽歿所著小廬詞頗能脫去塵塊巫山一段雲云岸柳吹成絮庭莎積作茵峭寒天氣又黃昏獨自暗銷魂○有月無人地多愁少睡人梨花深院閉重門閑煞一枝春題畫菜筍連理枝云我問隣園叟食譜田家有小摘瓜壺橫堆茄莧大烹菰韭又爭如露甲紫煙萌擅年前冬後○此品公推久此味君知否二寸金盞三分玉版一卮瓊酒盼花開時節玉人來薦春盤纖手吳歌水龍吟云五湖煙水空濛一枝柔櫓衝煙破聲聲斷續三高祠

下垂虹亭左。掉入前溪。三三兩兩。菱歌相和。正圓沙清。  
淺。鳬飛拍拍。笑脫下紅裙裏。○最是曉風殘月。賸微茫。  
一星漁火。遙聞斷港。纔從浦轉。又穿橋過。水國陰晴。江  
鄉兒女。儘伊煩惱。怕驚他孤客。逢窗夢醒。又還重做。似  
較西堂百未詞爲勝。

翠雲松館詞德清諸生戴銅士

銘金

作其孫

望

遊聞出

以示余。剗剗尙有待也。菩薩蠻云。春風廿四番番換。珠  
零粉碎無人院。賸有燕飛回。怕銜雙尾杯。○初二兼下  
九。拜月盟星又。裊盡博山香。爲誰空斷腸。喝火令云。燕  
壘依梁穩。魚環上鎖遲。香殘金鴨細於絲。幾度墨紗窗。

幙同泛卻寒卮。○密寫芙蓉字，偷裁蛺蝶詞。眠人風態  
費人思。記得膽瓶，愛插玉梅枝。記得小紅初嫁，正是雪  
飛時。雪後同人西塞探梅，尋張志和故居，不得歸途分  
韻。淡黃柳云攜筇攝屐，待把清芬挹，廿里尋春行得得。  
踏徧疎林曲澗，殘雪還留二分白。○釣磯側，樵青想曾  
立。倚修竹，袖羅碧。緬高風，重溯持竿客。一抹斜陽，峭寒  
如水，吹徹誰家玉笛。寒食前夕，聽雨柳梢，青雲一穗燈  
搖。衾寒似水，帳掩輕綃。知否山厨禁煙明日，潑火今朝。  
○問誰唱出瀟瀟，聽歌調，新翻六么。潑綠沾紅，杏花村  
店，楊柳河橋。咏蟬齊大樂，云黃梅欲出鶯喉老，亂喧雨

餘天氣古井槐疎平堤柳密滿地綠陰如水瑤琴漫理  
正短咽長嘶幾絲搖曳莫逞居高回頭須識有螳臂○  
繡牀那時午倦被驚回好夢雲鬢低墜恨訴齊宮愁啼  
漢苑添了惱儂情味秋風乍起早一夜涼侵薄羅衫被  
寄語行人問歸期定未

銅士稿中附其兄芝山明經

坤元

赴粵舟次依銅士韻

寄答摸魚兒云歎饑來驅人遠出大都寒士如此吹簫  
乞食真無奈敢憚川途迢遞帆掛矣任雪虐風饕要逐  
檣烏起炎天瘴地待茉莉薰香桺柳糝粉城訪趙佗址  
○嗟予季才華不減青兕池塘好句無二興酣落筆看

揮灑墨瀋睡花交麗。憑尺鯉把別後相思細寫加餐字。  
消愁無計。便浣手開函。百回高詠。甯讓對牀意。笙清簧  
脆正復相匹。

周叔雲給諫東鷗詞中有句云月在櫻桃樹底黃與吳  
菌次太守綸雪在山查樹上紅句同一思致紅黃二韻  
非深於詞者不能押亦不敢押其妙正在可解不可解

間太守由貢生官中書奉 詔譜椒山樂府特邀 稱  
賞遷武選司員外郎蓋卽以椒山原官官之其 寵眷  
如此旋出守湖州鋤強扶弱不受請託致失上官意以  
詩酒不事事罷官早歲有把酒祝東風種出雙紅豆句

因之得名惜全闕不稱所著藝香詞已錄入四庫全書  
其吳興感事相見歡云西風落日登臺眼重開無數繞  
城山色送青來○今古事吳越地幾雄才一片項王馬  
勒亂山堆音餘言外足冠全編他詞未能稱是

前歲次兒承祐回自都門得近人詞數帙遙情逸韻妙  
雜仙心慢詞不及錄錄小令數闕於此華亭張金治孝  
廉興鏞遠春詞南歌子云舊夢雲吹散新愁草對生是

誰彈出四絃聲不管江南詞客怕重聽○山色華不注  
波光厯下亭年時爪印認分明輸與如珠泉水似前清  
太倉王季旭明經曦鹿門詞踏莎行云樹杪風嘶窗



月透一尊誰伴離人酒。近來情緒更堪憐。影兒也比當時瘦。○春意全闌。春情非舊。迢迢又聽征程漏。今宵有夢待如何。不如和夢都無有。丹徒錢鶴山孝廉之鼎雙

花閣詞蝶戀花云。澹沱韶光花尙早。嫩柳枝頭。著得春多少。水曲紅樓深窈窕。一梳新月窺煙杪。○樓上寒輕人語悄。繡幕蘭燈。只有雙棲好。淚溼銀箏和夢抱。卻愁吟鬢天涯老。武進湯果卿司馬成烈

清淮詞蘇幕遮云

燕交飛。鶯解語。簾內輕寒。簾外廉纖雨。無數游絲攔不住。一片殘紅。又逐東流去。○木蘭舟。桃葉渡。芳草連綿。認是江南路。惱煞啼鴉催報曙。歸夢迢迢。做也曾無據。

新建勒少仲觀察

方鉤

樽州詞醉花陰云湖上長堤煙

壓樹暝色催津鼓。水濶雁聲寒。喚起離人。夢落荒洲渡。  
○秋來已是添愁緒。更向天涯去。爭得不淒涼。一陣西  
風。一陣蘆花雨。錢塘陳實庵太史鴛鴦宜福館詞謁金  
門云風乍定。吹瘦一窗花影。錦帳香溫春睡靜。燕歸人  
未醒。○簾外夕陽紅賸。簾內嫩寒猶凝。昨夜雨聲誰共  
聽。小樓銀燭冷。憶少年云無風簾幙。無塵階砌。無人庭  
院。斜陽更無語。但樓頭紅短。○淺色羅屏生綠展。舊題  
詩。蠹痕零亂。江城夜橫笛。又梅花吹滿。上海王叔彝太  
守慶勳沿波舫詞少年遊云梧桐影外月波流。清景十

分幽衣上涼多。笛邊風緊。殘夢五更頭。○蟾輝問有何  
人賞。獨自倚層樓。萬籟沉空。纖雲消盡。冷浸一城秋。常  
熟王蓉洲觀察憲成桐華仙館詞祝英臺近云洛城鐘  
梁苑樹中有恨無數。脈脈相思。不記幾朝暮。盼他安石  
榴開。玉人歸未。甚瘦損腰圍。不顧。○信頻誤。便算清夢  
分明。夢醒總無據。彩筆書空。獨自背人語。早知春去無  
踪。當時悔煞。怎容易。送將春去。